

ՀՀ ԳԱ ԱԿԱԴԵՄԻԱՅԻ ՆԱԽԱԳԱՀՈՒԹՅՈՒՆԸ ՆՇԵՑ
«ՊԱՏՄԱ-ԲԱՆԱՍԻՐԱԿԱՆ ՀԱՆԴԵՍԻ» 40-ԱՄՅԱԿԸ

Ս. թ. հոկտեմբերի 10-ին Հայաստանի ԳԱ-ում տեղի ունեցավ նախագահության ընդլայնված նիստ, որին մասնակցում էին ակադեմիկոսներ, ինստիտուտների տնօրեններ, գիտական աշխատողներ, Երևանի պետական համալսարանի և Խ. Աբովյանի անվան մանկավարժական ինստիտուտի դասախոսներ, հյուրեր արտասահմանից, մամուլի ու ռադիոյի ներկայացուցիչներ և ուրիշներ:

Բացելով նիստը, ակադեմիայի պրեզիդենտ Ֆ. Տ. Սարգսյանը ասաց. այսօր մենք նշում ենք մեծ համբավ ձեռք բերած «Պատմա-բանասիրական հանդեսի» 40-ամյակը: Արդեն շորս տասնամյակ շարունակ բարձր մակարդակով քննարկվում ու լուսաբանվում են հայագիտության, կովկասագիտության, արևելագիտության հարցեր: Պարբերականը իր շուրջն է համախմբել ինչպես հայ, այնպես էլ օտարազգի բազմաթիվ հայագետների:

Կարևոր է նշել, որ Հանդեսում լուսաբանվել են ոչ միայն հին ու միջնադարյան շրջանի, այլև նոր շրջանի պատմության հարցերը: Հայտնի է, որ ՊԲՀ-ի ստեղծման գործում մեծ են եղել ակադեմիկոս Մ. Գ. Ներսիսյանի նախաձեռնությունը ու եռանդուն ջանքերը: Այդ մասին և ընդհանրապես Հանդեսի միջադրային հեղինակության մասին քանիցս զրել է ակադեմիայի նախկին պրեզիդենտ, աշխարհահռչակ գիտնական Վիկտոր Համբարձումյանը:

Դիմելով Մ. Ներսիսյանին Ֆ. Սարգսյանը ասաց. հարգելի Մկրտիչ Գեղամովիչ, Դուք արդեն 40 տարի անընդմեջ հաջողությամբ խմբագրում եք մեր նշանավոր պարբերականը: Սրտանց շնորհավորելով «Պատմա-բանասիրական հանդեսի» քառասունամյա պանծալի հոբելյանը, թույլ տվեք սեղմել Ձեր վաստակած, տակավին կորովի ձեռքը և ցանկալ Ձեզ և խմբագրական խորհրդին նորանոր հաջողություններ:

Ակադեմիայի պրեզիդենտը այնուհետև հրապարակեց Հայաստանի Հանրապետության նախագահ Լևոն Տեր-Պետրոսյանի ուղերձը, որում բարձր է գնահատվում Հանդեսի դերը հայագիտության զարգացման գործում:

Ողջունի խոսքով հանդես եկավ Երևանի պետական համալսարանի ռեկտոր, ակադեմիկոս Ռ. Մարտիրոսյանը: Խոսքն ուղղվելով Հանդեսի խմբագիր Մ. Ներսիսյանին նա ասաց. Ձեր անմիջական ջանքերով ծնունդ առավ մեր բոլորի կողմից սիրված «Պատմա-բանասիրական հանդեսը»: Այսօր հետադարձ հայացք նետելով Հանդեսի անցած ուղուն, որի անփոփոխ գլխավոր խմբագիրն եք, հիացմունքով պետք է արձանագրել Հանդեսի համընդգրկուն բնույթը, հետաքրքրությունների լայն շրջանակը. հայոց հին և միջնադարյան, նոր և նորագույն պատմություն, աղբյուրագիտություն և վիճաբանություն, հնագիտություն և ազդեցություն, դրականագիտություն և լեզվաբանություն, փոխսոսկություն և իրավունքի պատմություն, արվեստ և ճարտարապետություն: Երևանի պետական համալսարանի ռեկտորատը, գիտական խորհուրդը և ողջ կոլեկտիվը, այդ թվում նրա առաջատար ջոկատներից մեկը՝ պատմության ֆակուլտետի կոլեկտիվը չբռնորեն շնորհավորում են ՊԲՀ-ի խմբագրությունը Հանդեսի 40-ամյա հոբելյանի առթիվ, ցանկանում են ստեղծագործական մեծ հաջողություններ, ուժ, եռանդ և կորով այս հերավի հայրենասիրական գործը շարունակելու համար:

Ակադեմիկոս-քարտուղար Վ. Բարխուդարյանը իր խոսքում ասաց. նշում ենք հոբելյանը մի հանդեսի, որը 40 տարվա ընթացքում իր շուրջն է համախմբել նշանավոր շատ հայագետների ու արևելագետների: Սովետական իշխանության տարիներին Հանդեսը կարողացավ պահպանել իր բարձր պրոֆեսիոնալ մակարդակը: Նրա էջերում քննարկվել ու լուսաբանվել են հայագիտական ու արևելագիտական կնճռոտ շատ հարցեր: Ի դեպ, Հանդեսը մեր ընթերցողներին միշտ էլ տեղյակ է պահել Սփյուռքում կատարվող իրադարձություններին: Նա հրապարակել է բազմաթիվ հոդվածներ պատմության թուրք, ադրբեջանցի և այլ կեղծարարների դեմ: Հանդեսի բազմամյա խմբագիր Մ. Ներսիսյանին ցանկանում եմ քաջառողջություն և նոր ստեղծագործական հաջողություններ:

Ակադեմիկոս Զահուկյանը ասաց. մեր ժամանակակից գիտության մեջ «Պատմա-բանասիրական հանդեսը» ունի իր ուրույն տեղը: Ժիշտ է, ունեցել ենք «Բազմավեպ», «Հանդես ամսօրյա», բայց Հանդեսն իր գիտական արժեքով ոչ միայն չի զիջում նրանց, այլև շատ հարցերում անփոխարինելի է: Հանդեսի կայացման գործում մեծ ավանդ ունի մեր սիրելի Մկրտիչ Գեղամովիչը, որի զարմանալի եռանդը, սկզբունքայնությունը, աշխատասիրությունը Հանդեսը դարձրին համաշխարհային կշիռ ունեցող մի պարբերական: Ցանկանաք երկար կյանք մեր նշանավոր պարբերականին:

Այնուհետև ելույթ ունեցավ ակադեմիկոս էդ. Զրբաշյանը: Սովորաբար Ակադեմիայի նախագահությունը նշում է այս կամ այն անհատի ծննդյան հոբելյանը: Առաջին անգամ է, որ մեր կողմից նշվում է մի պարբերականի հոբելյան, որն իր մակալողակով ձեռք է բերել համահայկական, համաշխարհային ճանաչում: Հանդեսը եկել է փոխարինելու «Բազմավեպին», «Հանդես ամսօրյային»: Խմբագիր Ներսիսյանը 40 տարի անընդմեջ մեծ նվիրվածությամբ բոլորանվեր աշխատանք է տարել: Մեծ պատիվ է տպագրվել Հանդեսում: Վերջին տարիներին, սակայն, կրճատվել է Հանդեսի պարբերականությունը, հասարակությունը սպասում է այս պարբերականին, գոնե կարողանանք երեք համար տպագրել տարեկան: Շնորհավորում եմ մեզ բոլորիս և առաջին հերթին Մկրտիչ Գեղամովիչին:

Ակադեմիկոս Վ. Նալբանդյան. ամենահեղինակավոր պարբերականն է «Պատմա-բանասիրական հանդեսը»: Մի ամբողջ սերունդ է դաստիարակվել այս ամսագրով: Հանդեսն աշխարհում մեծ ճանաչում ունի, նա ամենից շատ պահանջվող պարբերականն է, 124 երկրներից պահանջներ ունենք: Մկրտիչ Գեղամովիչի մեծ վաստակը այն է, որ նա չթողեց, որ Հանդեսը գաղափարական տարուբերումների ենթարկվի: Սիրելի խմբագրին ցանկանաք երկտասարդական եռանդ Հանդեսի այս բարձր մակարդակը պահպանելու համար:

Հանդեսին շնորհավորեցին նաև նիստին մասնակցող արտասահմանցի հյուրերը՝ անվանի հայագետ Տիգրան Կուլումջյանը և Նրուսահեմի համալսարանի հայագիտական ամբիոնի ռա.ուս. Ռոբերտա էրվինը:

Տ. Կուլումջյանը ասաց, որ Հանդեսը սքանչելի պարբերական է, հայագիտական հանրագիտական: Նա առաջարկեց Հանդեսը և ընդհանրապես հայագիտական դրականությունը արտասահմանում տարածելու համար ստեղծել մի կենտրոն: Մենք, Սփյուռքի հայագետներս, կաջակցենք այդ գործի կազմակերպմանը:

Ռոբերտա էրվինը իր ելույթում ասաց. ինձի համար մեծ հաճույք է և մեծագույն պատիվ այս նվիրական բեմին վրա գտնվել: Տոնել ՊՐՀ-ի 40-ամյակը կնշանակե տոնել հայագիտության մասնակի կարևորագույն կոթողներն մեկը: Ձեզ բոլորին համար անոր խաղացած դերը և նշանակությունը մեծ են: Իսկ մեզի համար, որոնք Հայաստանը ապրելու և անոր մտավորական կյանքին օգտվելու բախտը միայն պարբերաբար կունենան, ՊՐՀ-ին դերը թերևս ավելի ալ կարևոր եղած է: Աշակերտական մեր առաջին իսկ օրերն, մենք, շատ շրջաններու մեջ հայագիտությամբ զբաղվողներս, ճանաչած

ենք «Պատմա-բանասիրական հանդեսը» իբրև ամենեն ընտիր գիտական հրատարակություն, որ լույս կտեսնե հայերեն լեզվով: Մեզի հանձնարարած են մեր ուսուցիչներն այդ Հանդեսը կարդալ և ուսումնասիրել, իբրև լավագույն միջոց մեր ընդհանուր գիտությունը զարգացնելու համար: Խմբագիր ներսիսյանը մեծ աշխատանք ըրած է տարիներ շարունակ հավաքելու և ներկայացնելու բարձրագույն մակարդակի և որակի հոգվածներ հայագիտության ամեն տեսանկյունեն պատրաստած: Եվ ոչ միայն այդպես, այլ ՊԲՀ-ն իր ասպարեզ բացած է մեր արտասահմանի ժանոթ գիտնականներու նաև: Չկա մեծ անուն մի Սփյուռքի մեջ, որու աշխատանքը լույս չէ տեսած ՊԲՀ-ի էջերուն մեջ: Մենք բոլորս շնորհակալությամբ պարտք ունինք Ձեզ հանդես և ՊԲՀ-ի խմբագրական մարմնին հանդես, որ նույնիսկ դժվարագույն օրերուն ընթացքին վառ պահած եք հայագիտության այս սքանչելի ջահը: Երկար կյանք կամղթենք ՊԲՀ-ին, սրտանց կշնորհավորեմ Ձեզի:

Պատմ. գիտ. դոկտոր Պ. Մուրադյան. «Պատմա-բանասիրական հանդեսը» հայագիտական ամենատարածված ու հեղինակավոր պարբերականն է: Նրա խմբագիր ներսիսյանի ջանքերով Հանդեսը մեծ ծառայություն է մատուցում ոչ միայն հայագիտությանը, այլև կովկասագիտությանը, բյուզանդագիտությանը և արևելագիտությանը: Տ. Կուլումջյանը ճիշտ առաջարկ արեց: Շնորհավորում եմ մեր խմբագրին և բոլոր հայագետներին:

Այնուհետև ելույթ ունեցավ «Լրբերի» խմբագիր Ա. Խառատյանը: Դիմելով Հանդեսի խմբագիր Մ. Գ. ներսիսյանին նա ասաց. «Ջերմորեն և ի սրտե շնորհավորում ենք Ձեզ «Պատմա-բանասիրական հանդեսի» հրատարակության 40-ամյակի առթիվ: Հայ գիտական մամուլի անդամանում «Հանդեսը» զարգացման նոր փուլ նշանավորեց հայագիտության, արևելագիտության, կովկասագիտության, բյուզանդագիտության և հասարակագիտության այլ բնագավառներում՝ միշտ հավատարիմ մնալով գիտական անաչառությանն ու սկզբունքայնությանը: Չորս տասնամյակ ի վեր իր կորովամիտ հիմնադրի ու գլխավոր խմբագրի՝ ակադեմիկոս Մ. Գ. ներսիսյանի ղեկավարությամբ «Հանդեսը» շարունակում է իր նվիրական գործը:

Մանկավարժական ինստիտուտի ամբիոնի վարիչ Մ. Կարապետյանը իր ելույթում նշեց. Խ. Աբովյանի անվան հայկական պետական մանկավարժական ինստիտուտի ղեկավարությամբ, պատմության և բանասիրության ֆակուլտետների ղեկնատները, Հայոց, Ռուսաստանի, Ընդհանուր պատմության ամբիոնները, ինստիտուտի պրոֆեսորադասախոսական ողջ անձնակազմը և ուսանողությունը ջերմորեն ողջունում և շնորհավորում են Ձեզ՝ Մկրտիչ Գեղամովիչ, ՊԲՀ-ի հիմնադրման 40-ամյա հոբելյանի առթիվ:

«Պատմա-բանասիրական հանդեսը», որի հիմնադիրն ու անփոփոխ խմբագիրն եք Դուք, եղել և մնում է Աբովյանցիների սիրելի, ընդունված և սպասված պարբերականը, որի հրապարակումները միշտ էլ բավարարում են տվել նրանց պահանջներին, աչքի են ընկել գիտական խորությամբ ու թարմությամբ, բանավեճային թեմաների արդիականությամբ ու հրատապությամբ: Հանդեսը նաև գիտական լռատվության ամենալուրջ ու ծանրակշիռ աղբյուր է եղել նրանց բոլորի համար:

ՀՀ ակադեմիայի փոխնախագահ Գ. Սարգսյանն ասաց. եղել են պարբերականներ, որ ծնվել են և դադարել: Բայց մեծ նշանակություն ունի, թե ով է ղեկավարում պարբերականը: Նշելով մեր փառավոր «Պատմա-բանասիրական հանդեսի» 40-ամյակը, հավաստում ենք, որ Հանդեսը անքակտելի կապերով կապված է Մ. ներսիսյանի անվան հետ: Պարբերականի հիմնադրվելը դժվար է, բայց պահպանելն է առավել կարևորը և մանավանդ մակարդակը պահպանելը:

Պատմության ինստիտուտի դիրեկտորի տեղակալ Ա. Մելքոնյանը գիտական կոլեկտիվի կողմից ջերմորեն շնորհավորելով հանձնեց ուղերձը, որում ասված է. «40 տարի Հանդեսը եղել է հայագիտության զարգացման

հալելին, իր էջերում լուսաբանել է հայ ժողովրդի քաղաքական, տնտեսական, պատմության և մշակույթի բազմաթիվ հարցեր, հրապարակել մեծ թվով արխիվային վավերագրեր ու սկզբնաղբյուրներ: «Պատմա-բանասիրական հանդեսը» իր արժանի տեղն ունի հայ մամուլի պատմության մեջ և մեծ է նրա անփոփոխ ու նվիրյալ խմբագիր ակադեմիկոս Մկրտիչ Ներսիսյանի վաստակը այն համաշխարհային գիտական մակարդակի վրա պահելու և ճանաչման արժանացնելու գործում»:

Արևելագիտության ինստիտուտի դիրեկտոր Ն. Հովհաննիսյանը իր ելույթում նշեց, որ 40 տարի շարունակ հայ գիտնականը սպասել և հետաքրքրությամբ ընթերցել է Հանդեսը, որն իր մրցակիցը շունի իր բարձր ճաշակով, ու հարուստ բովանդակությամբ: Մ. Ներսիսյանը Հանդեսի դուռը փակել է դիլետանտության առջև: «Պատմա-բանասիրական հանդեսը», իհարկե հայագիտական պարբերական է, սակայն նրա էջերում տեղ են գտել և՛ առևելագիտությունը, և՛ կովկասագիտությունն ու բյուզանդագիտությունը: Հանդեսին անհամբեր սպասում են նրա բազմահազար ընթերցողները:

Վերջում իր շնորհակալական խոսքն ասաց Հանդեսի խմբագիր Մ. Ներսիսյանը: Նա իր խորին շնորհակալությունը հայտնեց նիստի բոլոր մասնակիցներին, ինչպես նաև Հայաստանի Հանրապետության նախագահ Լևոն Տեր-Պետրոսյանին նրա ողջունի ուղերձի համար: Ապա կանդ առավ Հանդեսի առաջիկա մի քանի խնդիրների ու անելիքների վրա: Ներսիսյանը հույս հայտնեց, որ Ակադեմիայի ղեկավարությունը կապահովի պարբերականի հետագա անխափան հրատարակությունը:

Նախագահության ընդունած որոշման մեջ մասնավորապես ասված է, որ պետք է հրատարակել պարբերականի 40 տարվա մատենագիտությունը հայերեն, ռուսերեն և անգլերեն լեզուներով, իսկ 40 տարի Հանդեսի անընդմեջ խմբագիր Մ. Ներսիսյանին ներկայացնել կառավարական պարգևի:

Ն. Դ.

ПРЕЗИДИУМ НАН АРМЕНИИ ОТМЕТИЛ 40-ЛЕТИЕ «ИСТОРИКО-ФИЛОЛОГИЧЕСКОГО ЖУРНАЛА»

Р е з ю м е

10 октября сего года состоялось расширенное заседание Президиума НАН РА, посвященное 40-летию «Историко-филологического журнала». Открывая заседание, президент НАН РА академик Ф. Т. Саркисян сказал, что «Историко-филологический журнал», который был основан в 1958 г. по инициативе академика М. Г. Нерсисяна, внес весомый вклад в развитие арменоведения, кавказоведения, востоковедения и сегодня считается самым авторитетным периодическим арменоведческим изданием. Академик Ф. Т. Саркисян зачитал приветствие Президента РА Л. Тер-Петросяна, в котором высоко оценивается роль Журнала в развитии арменоведения. От имени коллектива Ереванского государственного университета выступил ректор академик Р. Мартиросян. С приветствиями обратились также академики В. Бархударян, Эд. Джрбашян. Г. Джаукян, В. Налбандян, Г. Саркисян, гости из-за рубежа Тигран Кюмджян, Роберта Эрвин и другие. В конце заседания со словами благодарности выступил бессменный редактор Журнала академик М. Г. Нерсисян.

THE PRESIDUM OF NAS OF ARMENIA CELEBRATED
THE 40TH ANNIVERSARY OF THE „PATMA-BANASIRAKAN HANDES“

S u m m a r y

Extended session of the Presidium of NAS of Armenia dedicated to the 40th anniversary of the „Patma-Banasirakan Handes“ was held on October 10, 1997. Opening the session the President of NAS of Armenia said that the journal, which was established in 1958 at the initiative of the academician M. G. Nersissian, made a considerable contribution in the development of Armenology, Caucasology, Orientology which is currently considered the most authoritative armenological periodical. Academician F. T. Sarkissian read the president Levon Ter-Petrosian's welcoming speech, in which he highly appreciates the role of the journal in the development of Armenology. Academician R. Martirosian, Rector of Yerevan State University, addressed the participants on behalf of his University staff. The session was welcomed by the academicians V. Barkhudarian, E. Jerbashian, G. Jakoubkian, V. Nalbandian, G. Sarkissian, guests from abroad: Dr. Tigran Koujumjian and Roberta Ervin, and others as well. In return, academician M. G. Nersissian, the permanent editor of the journal expressed his gratitude.

«ՊԱՏՄԱ-ԲԱՆԱՍԻՐԱԿԱՆ ՀԱՆԴԵՍԻ» ԳԼԽԱՎՈՐ ԽՄԲԱԳԻՐ,
ԱԿԱԴԵՄԻԿՈՍ ՄԿՐՏԻՋ ՆԵՐՍԻՍՅԱՆԻՆ

Մեծարգո գլխավոր խմբագիր:

Քառասուն տարի առաջ, 1958 թվականին, Ձեր եռանդուն ջանքերի շնորհիվ և Հայաստանի Գիտությունների ազգային ակադեմիայի նախագահության հատուկ որոշմամբ, հիմնադրվեց հայ պարբերական մամուլի պատմության մեջ իր նախադեպը չունեցող հայագիտական եռամսյա «Պատմա-բանասիրական հանգեսը», որի գլխավոր խմբագիր հաստատվեցիք Դուք և ահա, շորս տասնամյակ անընդմեջ, մեծ եռանդով ու նվիրումով շարունակում եք ղեկավարել Հանդեսի խմբագրական աշխատանքները:

Ձեր գիտակազմակերպչական սթափ ու բազմադրյուն գործունեության շնորհիվ Ձեր գլխավորած Հանդեսը շատ կարճ ժամանակամիջոցում ձեռք բերեց միջազգային պատշաճ համբավ ու հեղինակություն:

Անցած քառասուն տարիների ընթացքում Հանդեսն իր հրատարակած 145 մեծադիր համարներում ընդգրկած հարյուրավոր անվանի հեղինակների շուրջ 4000-ի հասնող գիտական հոդվածներով ու հրապարակումներով կազմակերպել, ընթացք և ուղղություն է տվել արգի հայագիտական մտքի զարգացմանը, առաջադրել և քննել հայագիտության և հայ մշակույթի գրեթե բոլոր մասնաճյուղերին վերաբերող տակավին չլուսաբանված կամ վիճահարույց բազմաթիվ պրոբլեմներ, հայագիտության պատմությանը, տեսությանը, կոլկասագիտությանը և արևելագիտությանը առնչվող արդիական շատ խնդիրներ: Հանդեսը միաժամանակ գրախոսություններով, հաղորդումներով և դիտական տեղեկատվությամբ աշխուժորեն արձագանքել է Հայաստանում, Սփյուռքում, արտասահմանյան տարբեր երկրներում հայերին ու հայագիտությանը վերաբերող դիտական նոր հրապարակումներին ու կարևոր իրադարձություններին: Այս լայնահուն և բազմաբնույթ ընդգրկումների, հոդվածների և հաղորդումների տարալեզու հրապարակումների շնորհիվ «Պատմա-բանասիրական հանգեսը» այսօր իր շուրջն է համախմբել հայրենիքի, Սփյուռքի և արտասահմանյան տարբեր երկրների հայ և ալյազգի նշանավոր հայագետներին, որոնք Հանդեսում պարբերաբար հրատարակած իրենց բարձ-

րոտակ գիտական թղթակցություններով ընդմիջտ ապահովել են նրա միջազգային վարկն ու հեղինակությունը: «Պատմա-բանասիրական հանդեսն» այսօր աշխարհում դարձել է ամենաճանաչված և ամենահեղինակավոր հայագիտական պարբերականը, որի էջերը շնչում են արգի հայագիտական միտքը հուզող կենդանի հեքով ու ելևէջներով: «Պատմա-բանասիրական հանդեսի» այս քառասնամյա իսկապես հաղթարշավի համար հայագիտությունն ամենից առաջ պարտական է Ձեզ և Ձեր գլխավորած խմբագրական հանձնաժողովի քառասնամյա անձանձիր, բոլորանվեր աշխատանքին:

Ուստի սրտանց շնորհավորելով «Պատմա-բանասիրական հանդեսի» այս քառասնամյա պանծալի հոբելյանը՝ թույլ տվեք սեղմել Ձեր վաստակած, տակավին կորովի ձեռքը, ցանկալ քաջառողջություն, Ձեզ և խմբագրական հանձնաժողովին՝ նորանոր հաջողություններ, որպեսզի Հանդեսը 21-րդ դարաշեմին նոր և առավել զորեղ շեշտերով աշխարհում հնչեցնի հայագիտական մտքի նվաճումները:

Ֆ. ՍԱՐԳՍՅԱՆ

ՀՀ ԳԱԱ պրեզիդենտ, ակադեմիկոս

Գ. ՍԱՐԳՍՅԱՆ

ՀՀ ԳԱԱ Հասարակական գիտությունների
բաժանմունքի ակադեմիկոս-ֆաբրոպար